



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma :



TAPAK 8

Taliban Foreign Minister-i  
Islamabad semdangtsü

Saina Nehwal Asian Games  
Trials nung shilem magitetsü



VOL. XX NO. 200 (ADOK 200) DIMAPUR RASEMNÜ (WEDNESDAY) MONUPII (MAY) 03, 2023 ₹ 5.00

## Tsüraburtemi wazüka yutsüba sobaliba tajung aika sama odagi: Neiphui Rio



May 2, 2023 nü Mokokchung nung Moatsü bejungmung sentong nung Chief Minister Neiphui Rio aser Minister Metsübu Jamir na den 14 Tribal Hohos nungi Tirtem, Ao Senden Tir külempi teka amteper tangokba noksa angur.

**Mokokchung, May 2, 2023 (TYO):** Tsüraburtemi wazüka yutsüba sobaliba tajung aika sama odagi, anungji iba ama sobaliba benjung nung kibong, medemsortem aser nüburtem adenshia ka nungi ka angazüktepsü kanga dang tongtipang lir ta tanü Mokokchung nung Ao Senden ayonga Moatsü benjungmung sentong nung Tejaoker Khutong Nagaland Chief Minister Neiphui Rio-i ashi.

"Alima melenshiba den ano tamangba yimsü arur külen asen sobaliba tajung aika sama aoba mapang ka nung Naga nung sobaliba wazüka ayutsü asoshi state sorkari kin ajak nung Road Show sentong agia aru. Iba sülenji Hornbill Festival koba "Festival of Festivals" ta ajar iba ya ajanga Naga nung sobaliba senmangji ka ta asüba tamaisü nung alima dang sayutsü asoshi amunger" ta Chief Minister Rio-isa ashi.

"Asenoki asen sobaliba tajungji tanurtem dang sayua anitetsüla aser ibaji ajanga dang asenoki asen sobaliba rizünga yutetsü. Asen Naga limai tamangba yimsü arudang sobaliba mebenshitsu ta shia aru. Tanü Naga nung ajak Christian kümogo saka asenok ayak mesamatsü asoshi asenoki

asen sobaliba mesentoktsüla" ta paisa ayongzük.

1832 nungi British nung Naga Hills-i aru aser Naga nung den rara aika rara, iba mapang nungji India nung aliba Princely States 565 liasü, item chuba yimlitemji British nungeri ka khen ka khen ta agiyonga ao.

Iba mapangji Naga nung ya nisung ishika dang süaka parnok ya tamaren rarar (warrior) nisung ta khuli ngutet, anungji parnoki Naga nung yimsüsüba nung teka mamoshi aser iba nungji ajemdaker 1873 nung Bengal Eastern Regulation Frontier Act London nung renem. Yongji Indian Constitution nung Article 371 Ainoka züluoka ayu. Iba ama jenjang ka nung alidang asenoki asen sobaliba senzüka mayutsüla ta Rio-isa metetdaksü.

Tanü Ao kin Moatsü benjungmung amungdang Aor dang masü saka iba benjung nungtem nung Naga nung kin ajak nung jatepa amungba ajanga Naga nung tashi itshitsü nükla angur ta CM Rio-isa ashi.

Naga nung yimden ken o küm 70 tema rara-a, jembia arur ceasefire joko küm 26 ajunger. Naga nung yimden mapa inyaktertem telung nung alirtem dang nenok kechi inyaktetdir aji

inyakang aser sarasademang aser nüchiso angutsü asü mangutsü ibajibo Tsüngrem kabu nung tokjang saka asen Naga nung tsüngda nung telungjem lidi ta Chief Minister ka ama pai Naga nung yimden lenirtem den lemsatepba indang olen ka metetdaksü.

"North East state nung Assam sülenbo asenok Nagaland mezüng statehood angu. Asenok sülen statehood angurtem ajak development nung asenok dang nungi tama süa odagi, asenoki development meshira solution sülen ajak agutsütsü, anungji Naga nung longjema alitsü nungdaker" ta Chief Minister-isa shisem.

May 9, 2023 nü All Tribal Hohos, civil society leaders, prominent leaders aser political parties ajak jatepa joint meeting ka agitsü aser iba nungji Urban Local Bodies election agitsü renemer küm 22 election magiteti aruba, Municipal election, totzü (oil) aser Registration of Indigenous Inhabitants of Nagaland onüktem jembitsü, anungji ajaki arua shilem agitsü mepishir, ta Neiphui Rio-isa metetdaksü.

"Anogo ishika tejakdang Nagaland nung election agiogo saka ENPO-i mokdangtsü

lemtetba atema Home Minister den lemsatep aser Nagaland nung tensa kanga majungtsü ama jembia, saka election kanga junga agitet aser BJP/NDPP absolute majority ngua sorkar kümogo. Iba asoshi Naga nung ajak dang pelar" ta Chief Minister-isa Sorkari Naga lima nung yimjung kadakja terenlok kadaktsü asoshi inyaksü ta paisa shisem.

Iba sentong nung Tetushi Tejaoker RD & SIRD Minister Wb. Metsübu Jamir-ia mapang tatsüka agia jembidang Aori aiben nememshinema dang alir, mabensaba mepiriba dang jembir, itemji mejembii tajung jembitsü tenzüki. Tsüngremi Aor moaja arudar, anungji tanü Moatsü amungba nungtem nung mashii tangatetbaji aidoker Tsüngrem dang temoatsü meshidi ta adenshia aliba Moatsü benjungmung ayongzük.

"Tsüngremi Naga nung nem arem, min, tzü mopung tajung aser ano ali telung nung tagi tarutsü aika agutsü, itemji miima meyui timi amshia tenük lapoka lanü putu asoshi sakasalema lidi" ta Minister Metsübu-isa ayongzüka ashi.

Sentong nungsa Chakhesang Public Organisation President Vezuhu Keyho, Chang Khulie

Setshang President Nunganglemba aser Sumi Hoho President Niheto Zhimomi nungeri Moatsü salem o jembia, tarur pela agizükba o Ao Senden Tir Chubawati Longchar-i jembia, Moatsü ratet Lanutemtsü Dobashi-i agi, Mokokchung Yim Rionsang Putu Menden-i aten aser Sobaliba ken aser Marepkong Watsü Telen-i Moatsü ken tena telok lemladaksüba den tebur aser tetsürtem Ar Atsütepa toktepba den teburtem Yar tsüngsang tetoktepba liasü aser MTBA Pastor Rev Ponen Longchar-i iba sentong nung Tsüngremer toachi lenisüba jazka sarasadema tenzüki.

Tanü iba sentong nung Minister G. Kaito Aye, Minister Salhoutuonuo Kruse, MP S. Phangnon Konyak, Advisor Temjenmenba, MLAA. Pangjung Jamir, MLA Imkongmar aser MLA Benei M. nungertem aden. Maneni, Tribal Hoho 14 nungi President-tem arua dena liasü aser Ao kin lokti tentet balala nungi aser nüburtem aika adenshia iba Moatsü sentong longso longosa agiogo

1. Tanü iba sentong agidang tebur Ar Atsütepa toktepba nung akokertem yamai liasü.  
1st - Alempang Ward 2nd - Salangtem Ward
2. Tetsürtem Ar Atsütepa toktepba nung akokertem yamai liasü.  
1st - Alempang Ward 2nd - Sangtemla Ward
3. Teburtem Yar tsüngsang tetoktepba nung akokertem yamai liasü.  
1st - Molungkimong Cultural Troupe  
2nd - Tongpang Reju Cultural Society, Tuli  
3rd - Tazülenden Cultural Society, Mopungchuket

## Ministry of MSME-i BizAmp sentong agitsü

**Dimapur, May 2, 2023 (TYO):** Ministry of Micro, Small & Medium Enterprises ajanga North East nung shishilembaba ajungkettsü atema sentong ka ayonga agitsü.

Iba sentong ya BizAmp lir aser May 4 nü Agro Expo Hall, Chümoukedima nung agitsü. Iba ya Ministry of MSME indang mezüngbuba outreach programme lir.

Iba sentong ya Ministry of MSME-i NSIC Venture Capital Fund Limited (NVCFL) den parnok Self Reliant India (SRI) Fund kübok ayongzük. Sentong nung Ministry of MSME, Secretary B.B Swain-i tongti tesemdanger ama shilem agitsü.

Mongulbarnü Hotel Saramati, Dimapur nung osangbener den jembidang "iba sentong ya North Eastern States nungi MSMEs tashi itdaksütsü aser SRI Fund

kübok tajangzüktem agitsü atema lir" ta Chief Executive Officer, NVCFL, Saravana Kumar-i ashi.

BizAmp nung North Eastern States 8 nungi MSMEs adentsü aser NVCFL indang SRI Fund ajanga tajangzük agitsü asoshi temulung agitsütsü. NE Region nung MSMEs dangi SRI Fund indang senotsü atongtsü atema iba sabang nung lemsatepsü, ta Kumar-i metetdaksü.

India sorkari Rs 10,006 crore indang outlay corpus ajanga SRI Fund tenzüka lir. Iba ya Daughter Funds ajanga MSMEs nem senotsü teyari agitsütsü atema lir. SRI fund ya NVCFL ajanga ketdangsüa amshir aser MSMEs renlokdaaksütsü atema Alternative Investment Fund (AIF) ka lir.

March 31, 2023 nü SRI Fund ajanga empanelled daughter funds 42 nem Rs. 5,120 crore agitsütsü nangzükogo.

## Naga aser Kuki nung Meitei nung nem ST jenjang agitsütsü memulunger

**Imphal, May 2, 2023 (Agencies):** Manipur nung Naga aser Kuki nungertem hill district headquarters nung "Tribal solidarity march" ka agitsü sentong renemer.

Indian Constitution indang Scheduled Tribe nung Meitei nung dendaktsütsü akhangba anema parnoki iba sentong agitsü.

Iba sentong ya All Tribal Students Union of Manipur (ATSUM) ajanga ayongzük aser Naga Students Union Chandel, Sadar Hills Tribal Union on Land

and Forests, Tangkhul Katamnao Saklong aser Tribal Churches Leaders Forum teloktemi pusema nungiter.

Meitei nungeri ST category nung dendaktsütsü akhangba aser lendenlen nungi MLA temi iba takhangba pusema anema onoki rally ayongzük, ta ATSUM-i metetdaksüogo.

Manipur High court nung single-Judge bench kati state sorkar dang hopta pezü tsüngda Meitei nungeri mepishiba agizükang ta tetuyuba agitsüba

sülen anogo ishika lir ATSUM-i iba telemtetba agi.

High court nung Acting Chief Justice MV Muralidharan indang bench-i iba tetuyuba agüja liasü.

Manipur nung Meitei nung nütüng yongsük 53% lir saka parnok ya ali tasazük 10% nung dang lir.

Manipur kübok tenemlen lisopurtem lir aser iba ya state indang ali tasazük 90% tema lir. Lisopur teimbaka Khristan tamangertem lir aser nütüng yongsük 40% shi lir.

## OIL-i Nagaland nung hydrocarbon exploration tenzüksü

**Guwahati, May 2, 2023 (Agencies):** Oil India Limited (OIL)-i Nagaland nung hydrocarbon exploration tenzüksü atema tebilemba lir.

Assam aser Nagaland tsüngda arrtsülen ashishitepba tesemtem nung oil & gas atsüteta agitsü mulungtepba sülen OIL-i iba mapa tenzüksü. Küm 30 tashi mapa kecha meinyak aruba sülen Assam aser Nagaland tsüngda tenangzüktep agiogo.

"Tebilemstitem koktetba sülen exploration maparen tenzüksü" ta OIL chairman & managing director Ranjit Rath-i ashi.

Assam shelf ta ajaba main producing area aser Nagaland lushi densema Assam-Arakan fold belt nung Oil & gas aika lir ta Rath-i ashi.

Nagaland nung OIL indang exploration acreage 3,000 sq km lir aser Nagaland den arrtsüa aliba Manipur nunga exploration atema

asadangtsü.

Tripura nung OIL-i drilling asitsü atema ali lemsüka lir. Brahmaputra, Pathshala aser Mangaldoi tzükütem Open Acreage Licensing Policy (OALP) bidding kübok lir aser seismic data acquisition temogo.

Maneni, Arunachal Pradesh nunga OIL-i exploration mapa teinyakdak lir aser extensive drilling asitsü sentong renemogo.



Dimapur, May 2: Ongpangkong Senso Telongjem Dimapur ajanga May 2, 2023 nü Senden Riju, Purana Bazaar, Dimapur nung "Telongjem aser Terenlok" omen nung ajemdaker Moatsü benjongmung munga liasü (Noksa telung nung abelen) Advisor, Information Public Relations, Soil & Water Conservation, Imkong L. Imchen (Tetushi Tejaoker) aser (achichi) Advisor, Labour, Employment & Skill Development, Excise, Moatoshi Longkumer (Mejeta Tejaoker) angur. Iba sentong nung Ongpangkongtsur Telongjem Dimapur ajanga tetsü-tebou ken ka aten.

### Union Minister of State, V.K Singh-i Mon semdang

**Dimapur, Monupii/May 02 (TYO):** Union Minister of State for Road Transport & Highways and Civil Aviation, Government of India, General (Retd) Dr. V.K Singh-i May 1, 2023 nü Mon district semdanga Deputy Commissioner, Mon indang Conference Hall nung District Administration aser Head of Offices tem den senden mena liasü.

Iba senden nung Union Minister-i ashiba agi, district nung terenlok mapa aser mapa tajung inyaktüsü yangji aliba contractor tem tajungba lir, kechiaser parnoki district indang kanga junga meteta lir.

Pai district ktdangsur dang entrepreneur workshop agütsüsü aser iba ama business tenzüksü jangraba nüburttem nem training agüja contract mapa tabu ajak inyakdaksütsü ajungshia liasü.

2014 küm sülen central sorkari North East nung temolung tali agütsür aser yamaji tangbo tesendaktep tajungba kumogo aser ajak tejakleni aor, ta pai ashi.

Anungji terenlok agi anünga alirtem atongsü ayongzüker aser sorkar mapa tajungtiba nung inyaktüsü ajungshia liasü.

Iba sülen ktdangsur den sensaksema mapang agia liasü

aser Minister-i senden atemba sülen District Hospital Mon semdanga liasü.

Sentong nung S. Phangnon Konyak, Member of Parliament (Rajya Sabha) ajanga Union Minister of State aser Mon district nung Head of Offices tem pela agizüka liasü aser Union Minister-i Mon semdangba atema pelaba lemsatepa liasü.

Iba senden nung Deputy Commissioner Mon, Ajit Kumar Verma menden liasü aser Temjennaro Longkumer, NCS ADC (HQ) ajanga Mon district indang tongmelang agi rateta ashi.

### NLA Committee ajanga department 11 den senden amentsü

**Kohima, Monupii/May 02 (TYO):** Nagaland Assembly Committee on Government Assurances (CGA) for 2023-24 ajanga department 11 nungi ktdangsurtem den 'oral evidence meeting' ka May 19 nü amentsü.

Iba senden nung shilem agitsüba department temji Health & Family Welfare, Works & Housing, Fisheries & Aquatic Resources, Civil Administrative Works, Public Health Engineering, Home, School Education, Public Works, Justice & Law, Fire & Emergency Services aser Higher & Technical Education alitsü.

Iba telemteba ya April 27 nü züngsemtem den CGA indang introductory meeting aser

adoption of 102nd aser 103rd main report agütsüba mapang agia liasü.

Iba senden nung CGA chairman Kuzholuzo Nienu-i o tatsüka jembidang Committee ya kanga tongtipang lir ta ashi, kobai sorkar inyakyim nung department balala inyaksangshi mita repranger ama inyaker.

Anungji züngsem ajaki tashi angatepa yaritepsü ayongzüker aser Committee tajungtiba nung maparen inyaktüsü atema züngsem ajaki yakyaka shilem agitsü ajungshir, ta pai shia liasü.

Tongtipang committee nung chairman ama pa shimba atema iba senden nung pai NLA Speaker dang pelaba lemsatep aser Assembly nung züngsem tasentem aser Assembly Secretariat nung Officers aser

Staff tema pelashishia agizüka liasü.

NLA CGA nungya MLAs G. Ikuto Zhimomi, A. Pangjung Jamir, Temjenmenba aser Naiba Konyak alitsü aser Assembly Secretariat tenüing nung NLA Secretary-in-Charge Khruohitunuo Rio, Additional Secretary Jenny Ndang, Joint Secretary Kedovino Peseyie, Under Secretary Alamle Sephe, Section Officer K. Nivishe Shohe aser Asst. Section Officer Vakranino Vincy nungertem alitsü.

Iba senden nung Committee ajanga 102th aser 103th main Reports adopt asü aser Department 11 nungi ktdangsurtem den Oral Evidence Meeting ka amentsü lemteta liasü.

### Jorhat nung Aortem Moatsü amung



**Dimapur, Monupii/May 02 (TYO):** Jorhat nung aliba Aortem nisung 82 sentepa May 1, 2023 nü Moatsü munga liasü aser Imotemsü Ao, IFS, Jorhat, par kibongi iba Moatsümung ayonga tarur ajak chiyongdakja liasü.

Iba sentong tenzüka Imli P

Lemtur, Pastor-i sarasadem aser Moatsü tayonger-i, pei sobaliba wazüka ayutsü, tetsü oshi mamatsü aser temeim nung longjema alitsü ayongzüka liasü. Tsürabur Nukentiba Lkr-i ajungshi o jembi aser Rev. Dr. Sashikaba ajanga Moatsümong ratet shia liasü.

Kasa sentong nung Moatsü tsüngsang aser kenten Rev. Dr. Bendangtemjen ajanga sayu aser Meren Pongener-i tepela O jembia liasü.

Tatem nung Abenla Jamir-i sarasadema sentong tembanga liasü, kong Moala menden liasü.

### New Accreditation Framework sentong agi

**Dimapur, Monupii/May 02 (TYO):** Non-Accredited Colleges indang Principals aser IQAC Co-ordinators tem atema New Accreditation Framework sentong ka May 2, 2023 nü Directorate of Higher Education indang Conference Hall nung Minister, Hinger Education & Tourism, Temjen Imna Along den agia liasü.

Minister-i government aser private college ajanga dang college renloksü asoshi kati ka den yaritepa shisa lemsatepsü ajungshia liasü.

Government college aser Private college temi telemteba balala agiba nung Government college temi mapang agir aser Private college

temi telemteba tekeraba nung agir, ta pai ashi aser non-accredited college tem dang NAAC accredit südakja state nungi kising masü saka mainland India nungi kaketshirtem arua züngtetsüsa education tajung agütsüsü Minister Imna Along-i ayongzüka liasü.

Iba sentong nung menden Dr. K. HukatoSwu, Dy. Director Higher Education liasü, Rokono P. Keyho, Jt. Director H.E. ajanga sarasadem, Dr. Sujata P. Shanbhag Adviser (NAAC) Nagarbhavi, Bangalore ajanga tayongzüka o jembi aser Dr. A. Nshoga ajanga melepzüng o jembia liasü.

### Assam Rifles-i Zunheboto nung NSCN (Niki Sumi) züngsem pongi apu



**Dimapur, Monupii/May 02 (TYO):** Osang tejangja kar nung ajemdaker Assam Rifles temi May 1, 2023 nü Zunheboto jila nung NSCN (Niki Sumu) indang Town Commander ka den military wing cadres asem aser civilian wing cadre ka pua liasü.

Osang ka ajanga ashiba agi,

parnok ket nungi .32 pistol ana, injang ter aser temesepba mozü den tashiyim amshia senotsü meshiba receipt tem ngutet.

Pua alirtem den parnok ket nungi ngutetba hadir aser osettem Zunheboto Police nem agütsüogo, ta sangdong ajanga ashi.



Dimapur Süngratsü Senso Telongjem (DSST) aser Dimapur Süngratsü Pongentenem Culture Club (DSPTCC) lungjemer lanurtem nem sobaliba indang tali angatetdaksütsü nükjidong nung May 2, 2023 nü "Asen Sobaliba Wazüka Yudi" omen kübok Khermahal, Dimapur nung DSST kimen kidang Moatsü munga liasü. Iba sentong nung DSST tir Lanuzulu Aier-i pela agizükba o jembi, DSPTCC tetsürtemi Alu-zünga ken aten, Dimapur Süngratsü Lanu Zünga ajanga tsüngsang ka ajanga shilem agi, DSPTCC ajanga Kimak ke aten, Medemsanger putu ait menden ajanga Azüto ken aten aser Er. J. Sashi Longchar ajanga tajungshi o jembia liasü.

### Medziphema City Centre nung dokan tazüing lir

**Dimapur, Monupii/May 02 (TYO):** Medziphema City Centre, Medziphema Town nung Ground Floor aser 1st Floor nung dokan aser office lapoktsü atema Nagaland nung tejangrar lisopur nungi application meshir, ta ADC & Administrator, Medziphema Town Council, Imsongmeren ajanga sangdong ka nung ashi.

Iba City Centre nung

Ground Floor nung dokan tazüing 14 aser 1st Floor nung office takdang trok tazüing lir. Tejangrar temi nüngdakba tesemtem tejangja den Indigenous certificate, Aadhar Card aser mobile number aliba application ADC & Administrator, Medziphema Town Council nem May 16, 2023 tashinung agütsüsü metetdaksür, ta sangdong ajanga ashi.

### PM Modi-i Sirohi nung rally ka nung shilem agitsü

**Jaipur, Monupii/May 2 (Agencies):** Ato Kilonser Narendra Modi-i, May 12 nü Rajasthan kübok Sirohi district nung rally ka nung shilem agitsü, ta BJP ketdangpurtemi Mongolbarnü metetdaksü.

BJP indang Rajasthan unit general secretary Bhajan Lal-i ashiba agi, Modi-i Abu Road nung rally ayongzüka agiba mapang o jembitsü, kong party lenirtem, ketdangpurtem aser party züngsemtem densema alitsü.

2023 küm Ato kilonser-i Congress-i yimsüsüa aliba state nung ya tang agi tasembenbuba rally nung shilem agitsü renema lir. Rajasthan nung taküm küm tatemlen assembly election agitsü lir.

January ita Modi-i, Lord Devnarayan asoba anogomung amungba mapang Bhilwara

nung lokti senden ka nung o jembia liasü. Iba sülen February ita pai Delhi-Mumbai Expressway, Delhi-Dausa-Lalsot section lapoktsüba sülen lokti senden ka nung o jembia liasü.

Assembly elections agitsü ita ishika dang anunga lia, Karnataka nung election tembangba sülen tanga party lenir tejentemia Rajasthan semdanga BJP züngsemtem den senden balala ayongzüka agitsü, ta party source kati ashi.

BJP tekolakba JP Nadda-i iba ita state semdangtsü akok, ta parnokisa metetdaksü.

BJP indang national general secretary aser Rajasthan in-charge Arun Singh, party indang central lenirtemi state semdangtsü aliba renemshia atatsü asoshi state nung mongzüker inyaksangshitsü, ta source-isa ashi.

### Indian nunger 231 Jeddah nungi Ahmedabad tongogo

**Ahmedabad, Monupii/May 2 (Agencies):** Gujarat nungi nisung 208 densema India nunger 231, shirnok Sudan nungi anina liasü, parnok Mongolbarnü Ahmedabad airport tonga aruogo, ta state sorkar ketdangsür kati metetdaksü. Parnok ya Centre indang 'Operation Kaveri' kübok anir aruogo.

Gujarat Minister of State for Home Harsh Sanghavi, shiba state sorkar Non-Resident Gujarati (NRG) division achayanger, pai India nungertem Saudi Arabia kübok Jeddah nungi special flight ka nung Sardar Vallabhbhai Patel International Airport tonga aruba sülen pelashishia agizüka liasü.

India nunger 231 rongnung Gujarat nungi 208, Punjab nungi 13 aser Rajasthan nungi 10 densema liasü, ta ketdangsüri ashi.

'Operation Kaveri' kübok India-i lisopurtem mepetmesü

adoker aliba Khartoum tesem nungi bus tem nung Port Sudan-i anir aoer aser idak nungjiagi Indian Air Force indang heavy-lift transport aircraft aser Indian Navy indang rongtem amshia Saudi Arabia kübok Jeddah yimti-i anir aoer.

Jeddah nungi India nungertem commercial tyayimtsütem mesüra IAF tayimtsütem nung kidangi anir arur. India-i Jeddah aser Port Sudan nung control room tem amenoka aser Khartoum nung India embassy-i Delhi nung Ministry of External Affairs' headquarters den tongtepratepba den item control room tem dena tongtepratepa arudar.

Sudan nung tang linük army aser paramilitary na mangatettep tulu adoker lir aser iba lendong nung nisung 400 shi süogo. Sudan nung mepetmesü tulu adokba sülen linük balalai parnok lisopurtem iba linük nungi anin tenzükogo.

### Sharad Pawar-i NCP tir mapa toktsüba sangdongogo



Nationalist Congress Party (NCP) tekolakba Sharad Pawar den party lenirtem Mumbai nung kaket ka sayaba sentong nung tangokba noksa nung angur. Pawar-i Mongbarnü ashiba agi, pai party tir mapa toktsüba asoshi telemtetba agiogo.

**New Delhi, Monupii/May 2 (Agencies):** Nationalist Congress Party tekolakba Sharad Pawar-i pa mapatoktsüba sangdongogo. "Ni NCP tir mapa toktsüba atema telemtetba agiogo," ta Pawar-i ashi. Pa indang autobiography, "Lok Majhe Sangaayi - Political Autobiography" sayaba sentong ka nung pai iba osang sangdonga liasü.

Party worker tem den jembiba mapang Pawar-i ashiba agi, party tir shimtsü atema committee ka tentettsüogo. Party lenir tejen, Praful Patel, Sunil Tatkare, Ajit Pawar, Jayant Patil aser tanga lenir kar densema committee ka tentetgo. "Ni kodang anentsü aji meteta lir. Ni NCP lenir tejentemi kümteba committee ka tentettsüogo aser parnoki taruba tir shimtsü," ta Pawar-i ashi. Ajisüaka Rajya Sabha züngsem shiba ano küm asem anunga lir, pai pa taoba küm 55 ama maneni lokti liba aser yimden yimsüsüba nung shilem agitsü, ta ashi.

Pai iba osang sangdongba sülen party züngsemtem aika temulung raksa aser pa pusema yimiyim ayima liasü aser party activists tem aikati pai telemtetba agiba ya meyipa agitsü asoshi mepeshi aser ashiba agi linüki pa nüngdaker.

Kasa mapang nung party worker aser lenirtemi Pawar dang pa telemtetba meyipa agitsü khanga liasü. Pai telemtetba meyipa magi tashi parnok iba tesem toktsür maotsü, ta shia liasü. (Maneni tapak 8 nung...)

### Goldy Brar Canada indang most wanted fugitive rongnung densema lir

**New Delhi, Monupii/May 2 (Agencies):** Canada nung amendaker aliba ozüing raksar Goldy Brar, Canada nung most-wanted list nung densema lir, ta itangiter source kati CNN-News18 dang ashi. Pa ya Punjabi nunger kentener aser yimden yimsüsür Sidhu Moose Wala tepsetertem rongnung tongtiba ta züngshir.

Satinderjit Singh Brar (Goldy Brar) Canada indang BOLO (Be on the Lookout) program kübok nisung 25 rongnung densema lir.

BOLO program director Max Langlois-i, Mongolbarnü aputsü bushia aliba parnok 25 indang noksa sayaba mapang, kari danga item nisungtem dak sendakba nung osang agütsüra senpet USD 50,000 nungi 250,000 tashi agütsüta ta shia

liasü. Satinderjeet Singh, shiba Punjab kübok Sri Muktsar Sahib nungi lir pa 2017 küm student visa bener Canada-i tazüingi ao, pa ya Lawrence Bishnoi gang nung züngsem ka lir. Police-i pa aputsü asoshi bushidar aser pa apuba sülen takaratiba nung India-i meyipa yoktsü, ta source-isa ashi.

Interpol website ajanga ashiba agi, Brar ya nisung tepsetba, criminal conspiracy aser ozüing alema prangbong hadir shibelenba aser nisung tepsettsü merangba atema aitsür lir. June ita Interpol-i pa anema Red Corner notice ka agüja liasü.

Taoba küm December ita osang ajanga, Goldy Brar ya nunger ketdangsürtemi California nung

sota yua lir, ta ashi. Ajisüaka Brar sota aliba mesüra apuba indang sorkar mesüra state police-i kecha osang magütsü.

Sidhu Moose Wala, shiba nüngtugu kentener aser yimden yimsüsür ka liasü, pa taoba küm May 29 nü Punjab kübok Mansa district nung tepset. Goldy Brar shiba Lawrence Bishnoi gang nung züngsem ka lir, pai Moose Wala tepsetba sülen ghonda ishika lir pai pa tepset ta nangzüka liasü.

Pa ya tepuokdak yua aliba ozüing raksar Lawrence Bishnoi den kanga junga sendaktepa lir, shiba tang NIA ket nung yua lir.

Brar-i ashiba agi, Akali lenir Vicky Middukhera asüba mang ayangtsü atema pai Sidhu Moose Wala tepset. Middukhera ya Lawrence Bishnoi den kanga junga sendaktepa liasü.

विद्यया ऽ मृतमश्नुते  
**क्षेत्रीय शिक्षा संस्थान, भुवनेश्वर**  
**REGIONAL INSTITUTE OF EDUCATION, BHUBANESWAR**  
 (National Council of Educational Research & Training)  
 Sachivalaya Marg, Bhubaneswar - 751022

Advt. No: 446 Dated: 01.05.2023

**ADMISSION NOTICE 2023-24**

Regional Institute of Education, NCERT, Bhubaneshwar-i 2023-24 academic session atema item Programmes/course agütsütsü.

**(1) B.Sc. B.Ed. (Four Year) (2) B.A. B.Ed. (Four Year) (3) B.Ed. (Two Year) (4) M.Ed. (Two Year).**

Item programme/course nung admission atema Common Entrance Examination aoashi temsüa aliba applicant online ajanga apply asütsü jaoker. CEE-2023 atema Nodal Centre ji Regional Institute of Education (RIE), Bhopal asütsü. Programme balala atema Candidate tem Online application/registration ya <https://www.cee.ncert.gov.in> ajanga asütsü. CEE-23 atema online application/registration asoshi **25.04.2023** nungi tenzüksü aser **06.06.2023** tatembangbuba anogo asütsü. Osang tejangjaba agitsü atema CEE-23 helpdesk phone number **0755-2661467 / 0755-2661468** mesüra RIE Bhopal emal ID: **ncertcee2023help@gail.com** ajanga tongteprateptetsü.

**PRINCIPAL**



2021 küm Rohini court nung khatepba ken o nung aija alisang Tillu Tajpuriya'er kinungertem Deen Dayaal Upadhyay Hospital mortuary kima tangokba noksa nung angur. Tillu ya Tihar jail nung Gogi gang-i amakba sülen iba mozükidang temang anepalua liasü.



## TIR YIMYIM YIMOBILEM (EDITORIAL)

DIMAPUR RASEMNÜ, MONUPII (MAY) 03, 2023

### Osangbenertem Nüchiso Anogo

Tanü ya alima ajunga nung osangbenertem asoshi nüchiso anogo, World Press Freedom Day, lir. Atangji, osangbenertem asoshi nüchiso anogomung ya osangbenertemi nüchiso bushiba agi mesüra osangbenertem nüchiso anguba agi amunger masü saka kin ka junga yangertetsü atema osangbenertem dang masü saka nisung ajak nem pei jeminütsü sademsadema jembitsüsa temeten agütsütsü nungdak angatetba agi amunger. Iba anogomung ya among tenzüker talangkabo masü. 1991 küm United Nations Educational, Scientific and Cultural Organisation (UNESCO) nung jembir UN nung benokba ama, 1993 küm United Nations lokti senden nung küm shia May 03 anogo ya Osangbenertem asoshi nüchiso anogomung amongtsü ta sangoktsüba sülen küm shia omen balala shimteta monga arur. Taküm küm iba anogomung asoshi shimteta omen "Shaping a Future of Rights : Freedom of Expression as a Drivers for all other Human Rights." Tarutsü atema temeten yangluba : Meimchir temeten ajak asoshi kecha tenokdangba melii sademsadema pei jeminütsü jembitetba temeten ya tanishir lir," ta shimteta lir. Atangji, linük temzüngi sensosanger ajak nem pei jeminütsü jembitsü aser pei bilemba kecha tenokdangba melii ashitsü asoshi temeten agüja liaka, ajakibo mejembitettsü, anungji parnok ajak atema jembitsürji osangbenertem akümer. Iba tangatetba nung taküm anogomung omen ya shimteta lir, kechiyong senso ka asoshi jembitsüba temeten yabo osangbener asoshi dang masü saka ajak atema, ajisüaka tanü ama osangbenertem anogomung nung jembir tapetba, kechiyong nisungtemi inyakba mapatem ajak rongnung o kuma yanglur metetdaksürtembo osangbenertem ya lir. Aji oda, kodang osangbenertemi tarendak aser tetsübu melii, shinga tsütsüa tejak meshitsüi, tasü itta tebilemba aser tatalokbatem indang sangdongtettir, idangji nübortem ajangzüker aser alima renloker. Iba jagi alima ajak nung senso shia dak pai mesüra lai bilemba, reprangtetba, metetba aser shinüba ajak shitetsüsa temeten alitsü nungdakba indang jembir. Tanü India nung senso shia nem pei jeminütsü jembitsü atema temeten linük temzüng arla 19(1)(a) nung agüja lir, ajisüaka iba temeten amshia mejembitettsüsa tenokdangba aika ajurur, kechiyong kari nisung kar anema jembira, shitak asüyonga aji manganüi okadak ken o agütsür aser osangbenertem dena puoka ayur. Atangji, temeten liaka tiyazü pei jeminütsü jembitsübo temeten magütsür mesüra nübortem rongnung tesempatep aser tsükchitap adoktsüsa lendong menatsüba o jembitsübo memelar. Temeten ya ajak nem mashimashi amshidaksüba oset ka masü saka temeten shia talenba lir. Item dakji alaka, senso kati pei bilemba aser pei temeten o jembiba atema mesüra government mapa nung ochimashi mapatem anema jembiba asoshi, konang tetushi angutsü melen, temerenshiang angutsüsa kümra, iba limajibo tangar menepa tejakleni aotsü asaktsü. Tanü tanga lima nung atalokbaji yutsür asen lima nunga asen sobaliba aser yimten pangzüng ozüng agi pei senso nem pei jeminütsü mejembidaksü aser peisasa telemtetba magidaksüi alena ayuba timtem agi asenok main kangshir. Koba lima nung südirsüaka temelenshi aser terenlok ya o jembiba nungi adoker. Ajisüaka, yimteni pei sensosangertem nem pei bilemba aser pei reprangtetba indang jembitsü memelara, pei lima aser lokti renlokdi asüyonga merenloktsü. Talenba aliba agi pei bilemba mejembitetba aser yimten nung pei aginüdak shilem magitetba purtemji, atangji, nücho masü, parnokji suwar mesüra shiruru asütsü. Tanü alima ajunga nung nübortem dak pei jeminütsü jembitsü temeten alitsü nungdakba indang osangbenertem anogo nung jembir amungdang, asen lima aser asen yimtaka sensosangertem nem pei jeminütsü mejembidaksüi alena lira salatsüla aser alima nung meimchir ajak tasodangyongi kasasa aso ta asüba tangatetba nung senso ajak meraketa sademsadema pei lima aser pei yimten yangerba nung shilem agia aientsüla, idangji dang asen lima aientsü, anungji asenoka aientsü.

## OLEMSABANG

### TZÜMAR MATSÜNGDANG ASENOK YA OKORA LIASÜ

~ T. Meren Paul, Kohima

Hapta anasemka tejaklen Assam yimtiba Guwahai nung April 13 nü Sarosojai Sports Stadium nung Assam nung asemdemer aser tsüngsanger nisung 11303 adenshia Bihu Tsüngkang ken dena tsüngsanga alima nung tesem ka nung kusa mapang ka nung longjemer tsüngsanga telok tulutiba otsü tasen ka yangluba mapang nung tsüngsang ken nung akhi tejen ken ka Naga Nagini Orora ta asendenshia adenba ajanga asenok kanga awakba, Assam nung sensosüa alir Konyak aser Sema nungeri ashishitepba asenoki angashiko. Parnok ken tetzü "Naga nunger Nagatsür mashi malu, süoshi agitsüa memetet aliba anir arua süoshi agitsü sayu" ta adenba ama angateter. Ni Mokochung nung alidang Nokchiraba Jamir den mensemdang akhidang Man Raja-i Assam amakdang Ahom Raja-iLongkhum nunger dang teyari meshi aser Longkhum nunger arrtandem jong aponger lua Ahom Raja yaria kumzük anungji Ahom Rajai tepelaba agi parnok nem ali agüja yim kümdaktsü aser iba yim dangji Longkhum Kosari Gaon/Longkhum Gaon Kosari ta aja aser yangji Longkhum nungeri Assam aser Naga tsüngta ali arlung azünga ayuba otsü ashiba bilemteter. Iba yimji tanü tashi nokdaka lir saka tangbo yangji Aor shinga mali südi.

Taoba küm 50/60 tsüngda nung asen Aolima aser Nagalima ya kangasa renloka tejakleni aoba asenoki asen nuk agi angur aser meteta arur. Nagaland Baptist Church Council Golden Jubilee Omen "From Darkness to Light" agiba-ji mapa ajak nung Naga nungerdak tapet liasü. Asenok Naga nunger ya aremshiruru dang nungi tera temaba jenjang nung lia aru. Tzüma-er, Assam nungeri asenok metetba ji asenok arrüshirdem nisung kolak bushia lenten lima jagi lua Tzümar kolak lepzüka bener aoba ajanga asenokji metet aser iba sülenjiang kumba, mersü takong, manü amala aonsutsü shishilemba-a yokdoker metsü (salt) ali-i Tzüma-i alu. Ahom nunger otsüren nung ashiba agi 1215 küm (thirteen century) Thailand nunger chuba chir katenung agi Sukhaba-i anir Thailand nungi arudang asen Naga lima ajanga Assam lenten bushia aludang tang asenoki amanglema aliba tesem kesa nungi sa asenok liasü aser asenok arem shiruru ama (savage) aliba ajanga asen lima taküm alitsü makoktsü ta ajeteta iba lima doktsür lenten lima bushia loadok südi.

(Maneni asüng adok nung...)

### MOATSÜ INDANG TONGMELANG TATSÜKA RATETTSÜR

~ I. Shilu Jamir, Dimapur.

Asen Aoer benjongmong tongti rongnung Moatsü ya küm shia mezüngbuba amonger.

#### Tongmelang ratet:

1. Lipok nungi aluyimba ya mezüngbuba aser tongtipangtiba mapa aser rongsenren lemagtem.
2. Mezüngi küm shia alu puok koba aotsü südir putirtemi anü külema anü dang asüngdanga dang lemtet.
3. Putiri Yimyim ayimokja mapang shitak nung yimkong ajak külemi künü yongi alu süi ao.
4. Alu chizüker apa lema yur yamaji ita, anogo shitak tetzüteta amteter ang alu arongi ao.
5. Alu ronger külen alu azümar putirtemi külema tentener ang alu metsü aremtsü mela aser inyaka tenzük.
6. April ita tashi nung alu nung tsük aser metsü jangnatsü ajak yoka renemer külen May ita tetenzük len Moatsü benjong anogo 6 nü among.
7. Alu ajidang nungi alu mapatem tenzuka metsü rema maparen ajak atemba asoshi Tsüngrem nem tenungsang agütsüba aser ano metsü remokba ajak to Tiyari kanga junga moaja meya indakjangni ta külema among .

Aser nüburtem ajak chia jema taküm kumzuka alitsü asoshi talubusa pokteta moajangni ta Tiyar dang mepia amongba benjongmong dang Moatsü ta ajar ta tsürabur nungi angazuka lemsateper.

Aji oda asen tsüraburtem Lipok nungi kechi inyakdir maparen ajak nung Tsüngrem dang ajak nung ochi shia meranga lia aru. Anungji asenokia maneni tanü tashi iba ji beshitsü ayongzüker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Kuzhami Baptist Churches Association-i Ordination &amp; Licencing sentong agi



**Dimapur, Monupii/May 02 (TYO):** Kuzhami Baptist Churches Association pur Ordination cum Licencing sentong ka April 30, 2023 nü Kuzhami Baptist Church, Chumoukedima nung agia liasü. Association ajanga Alo Medo aser Meyie Mero ordain asü aser Wolo Lasuh aser Medovi Koza na nem ministry license agüja liasü.

Rev. Dr. Kezühstülo-ü Kapfo, Sr. Pastor, KBCC ajanga Tsüngrem o jembu aser ordination cum ministry license maparen ketdangsüa agia liasü.

Lai iba sentong nung

adener dang tekülem ki sapang nungi mesüaka tamanger shiai tanüla anir arutsü sentong yanglutsü ayongzük.

Osang tajung ya kibok nunga asen kinunger, kidanger aser medemertem den lemsatet, ta lai ashi.

Ordination ya nungja ka kisüng masü saka bendanga agütsür Tsüngrem tenzükba yimya ka lir. Parnoki Tsüngrem mapa inyaksü shimtet. Tebui Yisu alimai mission mapa inyaksü yokba ama Yisu-i asenok dang osang tajung proksü yok, ta lai ashi.

Iba sentong nung menden

Rev. Neikko Mero, Sr. Pastor KCBCCK liasü, Rev. Khroto Mero, Pastor, Lekromi Baptist Church ajanga Lai zünga sarasadema liasü. Kuzhami Dimapur Choir, Lekromi Baptist Church choir, Kuzhami Chakhesang Baptist Church team aser Pfutsero Village BC nungi Sesoteu nungeri ken tena liasü.

Rev. Dr. Obed Marhu, Executive Director, KBCC ajanga ordain asür aser license angur indang takum otsü tongmelang agi zünga ashi aser Wethso Mero, President, KBCC ajanga kulizüng kaket agüja liasü.

## Tamangertem Turkey-i aruba nokdang

**Ankara, Monupii/May 02 (Agencies):** Turkey-i Khristanpur arutsü memelaba rongnung British tsür ka densema lir aser tang lai iba tenokdangba anema European Court of Human Rights nung ken o benoka lir aser bendanger Khristanpur aser missionary tem 'security threats' ta tenüng jalokja nokdangba yimya anema nokdaker.

Rachel aser Mario Zalma na Turkey nung küm ter dak tema liasü saka Turkey ketdangsür temi Mario ya 2019 küm "N-82" security code nung inoktsü aser Rachel ya 2020 küm kasa jenjang nung inoktsüba sülen UK-i meyiba aotsüsa akum. "Public order aser security" tsütsü tetsükdaktsü ka ama züngshir nisung nem iba code ya agütsür, ta human rights group ADF International ajanga ashi.

"Turkey-i Khristanpur mejungi amshiba anema onoki Rachel Zalma indang ken o ECHR nung benoka lir," ta ADF International indang Legal Officer Lidia Rieder-i sangdong ka nung ashi.

"Court ajanga Turkey nem obendang agütsütsü onoki imlar, aji asünung dang Khristanpur maneni tetsübo makai alitsü mesüra tanaben linüki aotsü asoshi tenokdangba agütsüba khuret malitsü."

2019 küm Association of Turkish Protestant Churches indang mungdang ka nung adener aika nem N-82 code agüja aliba kinungtsü o kinungbo nati meteta aru.

Iba mungdang nung adenba mechi nisung ka 'security threat' nung züngoksemba kuli

tejangja ngutet. Pa indang ken o okadak jembidang kuli kaket tem temai adokba nung Turkish national intelligence agency ajanga pa ya national security anema inyaker, kechiaser iba mungdang nung adener bendanger rongnung pa ka liasü, ta ashi.

"Tetasatsüka Turkey ketdangsür temi maneni tamangba yimsü temeden samaja Khristan yimsü prokshiba anendaktsütsü meranger," ta Rieder-i ashi.

Rachel aser Mario nati parnok N-82 nung züngoksemba atema Constitutional Court of Türkiye nung ken o benok saka parnok ken o magizük, anungji parnoki UK nung meyipa arua alitsüsa akum.

2022 küm October ita European Parliament nung "Freedom of Religion in Türkiye" sentong alidang tamangba yimsü nung ajemdaker Turkish sorkari human rights nung aibelena mapa tamajung inyakba indang kakteta jembia liasü. Turkey nung alidang ajangshibatam bilemteta jembidang, "Onoki Turkey lima meimer aser yangji aliba nüburttem asoshi mapa tajung inyakner. Onük state, linük mesüra Turkey nunger libaliru asoshi timtem masü," ta Mario Zalma-i ashi.

Turkey nung küm 100 tsüngta Khristan nütsüng shilem 20 aliba shilem 0.2 dang kumogo aser ibai talisa Turkey sorkari Khristanpur mejungi amshiba ajanga lir, ta ADF International ajanga ashi.

Open Doors ajanga ashiba agi, Turkey sorkari 2020 aser

2022 tsüngta bendanger Khristanpur aser parnok kibong 60 shi linük nungi meindokogo.

David Byle ta sür Canadian-American Khristan ka Turkey nung küm 19 tashi Tsüngrem mapa inyaka arur 2021 küm February ita linük nungi odaktsü aser ECHR nem ken o ka agüja liasü.

Turkey nung missionary mapa inyaksü ozüng agi mela lir, saka yimtung nung sayutsüngia jajar Byle ya 'public order aser security' asoshi timtem ta ketdangsür temi tai tonglokja kodanga linüki marudaktsütsü tenokdangba agütsü.

Turkey nung akhi mapang nungi missionary tem meyipa yokba otsü lir, saka Khristanpur meindokbabo ajema lir, ta Morning Star News ajanga 2021 küm shia liasü, koba German pastor ka iba mapang Turkey nungi mindokba ken o dak sendakba osang nung shia liasü.

2016 küm tiyonglen mitkar temi tashiyim amshia sorkar atsüngdoktsü merangba sülen Tir Recep Tayyip Erdogan indang sorkari Khristanpur aika linük nungi mindoktsü mesüra Turkey-i marudaktsütsü tenüng benden, ta MSN ajanga ashi.

"Erdogan aser par Justice and Development Party ya Turkish nationalists den tesendaktep yanglu, shirnoki mapang talangka nungi Khristanpur ya bendanger sorkar indang 'secret agent' aser Turkey anema inyaker ama züngshir," ta MSN ajangasa ashi, shirnoki Khristanpur reshikangshia amshiba asadanger.

## ANOGO ABEN TSÜNGREM DEN

Alima dang nungi tejangjaba  
T.ken 102:12-28

Alima nung kecha tejangja mali. "Alemlü nungi nai alima kimong yanger; aser anüngtemji ne teka mapa lir. Parnok samadoktsü, saka nabo alitsü, au, parnok ajak sobutsü amai ajentsü; süoshi ama nai parnok melentsütsü, aser parnok melenshitsü" (t.25,26). "Tejangji" alimaji samatsü. Yisui ashi, "Anüng aser alima süitemtsü, saka Kü O mesüitemtsü" (Matt. 24:25). Ne taküm nung tejangjatibaji kechi? Kechi nung nai ne taküm yangludar? Nai ibaji Kibuba nung yanglu tajungba; Paji shidak tejangja.

Yisu teti kasa dang lir. "Saka nabo kasa lir; aser ne küm tatebang malitsü" (t.27). Yisu Khrista yashi, tanü aser teti kasa dang lir. Tsüngremi iba lima yanglu, aser asen meketa kechisarena ajak teti alitsü ama repranger. Mapatem inyakba asenoki metet. Asenoki alima nungi nisung itai yoktsü akok. Tsüngremer lima ajak asatetta lir, saka Pai ashir item ajakji samatsü.

Na ken dang aliba lima nung alir ta metetta, nai kechi inyaksü? Tsüngrem, shiba teti alir Pa amangang. Pa dang sarasademang. "Tepetzük nisung sarasademba Pai angar, aser parnok sarasademba Pai mesensatsür" (t.17). Pa O nung amangang aser Pa tenüng asangba külemi aor. "Ibai tarutsü putu asoshi zülua alitsü; aser koba nübür paktetdaksüdir Kibuba asangtsü" (t.18).

Aikati parnok taküm iba lima kimong teraksa nung yanglur aser kenü iba den samatsü. Saka Tsüngrem memelenshir aser teti alir. Pai ne taküm Pa dak yangludaktsüner. Kodang nai sarasademdir, Pa teyanglubatem asoshi aser ne taküm nung Pa mapa asoshi Pa tenüng sangang.

Uganda nung kaketshir kati  
Khrista indang sayuba mechi tepset

**Nairobi, Monupii/May 02 (Agencies):** Uganda north tsütsü April 14 nü college azünger kati Muslim nunger ka den Khrista indang lemsatepba mechi tepset, ta külem kaketshir kati ashi.

Lira, Northern Region nung aliba Uganda Christian School of Professionals nung second-year azünger Jeremiah Mwanga ya Lira nung aliba Gwangabara cell, Boroboro ward, East Division nung school nung pa indang takdang nung tepset. Pa arishi küm 24 tain liasü.

Mwanga ya Uganda anüdoklen Kapchorwa District nungi liasü, aser kasa tesem nung alir Muslim nunger kaketshir kati pa tepset ta ken o benoka lir.

"School nung Muslim nungertem dang Khrista indang osangtajung sayua mashileni anir aser Khrista yimsü agizükidaktsür ta tai tonglokja pa tepsettsü amokmerena Jeremiah dangi messages tem yokba indang shia liasü," ta par medemer kati ashi.

"Pai Christian Union fellowship nungi sarasadem khanga liasü."

Par medemsangi ashiba agi, April 14 nü school telung nung takdang ka nungi aonung 10:00 ako meta ola tulu adokba angashi.

"Minute 30 shi lir ni iba tesemi asema ao aser iba ya Jeremiah indang takdang nungi liasü ta metet. Takdang telung nung azü agi sünga yimshir liasü," ta pai ashi.

Itangjibo Mwanga ya school anasa medical clinic kati anir orr liasü, ta pai ashi.

"Ni clinic atongdang medical personnel temi pa Lira Regional Hospital-i yokogo ta küdang ashi aser yangji pa tonga aruba sülen asü ta sangdong. Pa mozüki yipten nung tasü longdaka lia angu," ta ashi.

Medemsangi Mwanga indang mobile phone densema pa meyong osettem meshi.

"Phone lapoka repringdang Muslim nunger kaketshir kati amokmerena züluba messages tem angu, shiba Kapchorwa nungi arua liasü. Ni phone ya school administration dangi bener ao aser iba tatalokba police nem osang agütsü," ta pai ashi.

Temolung melemlü alisang Chengalat ya school nungi jena orr liasü. Lira nung aliba police temi Kapchorwa jila nung aliba police tem den jembu aser parnoki Chengalat ya jila nungi apu. Chengalat ya Lira-i anir aru aser yangji nisung tepsetba ken o ka pa anema benoka lir, ta tasüsang medemer kati ashi.

Uganda nung Khristanpur reshikangshiba rongnung ibai tesüsaba alitsü.

Uganda indang constitution aser danga ozüng temi tamangba yimsü temeden, nisung kati pei tamangba yimsü dangar dang sayutsü aser tamangba yimsü ka nungi kati meyiptsü mela lir. Uganda nütsüng yongsük shilem 12 shi Muslim nungertem lir aser parnok ya linük anüdoklen timba alir.

AO OSHI ANGAZÜKDAK: TANÜ ANGAZÜKTSÜBA OJANG



Pulapular

(adj) sentsü mekümte (dust colour)

\* Sepaitemi agiba sentsü aika pulapular angur.

Pulapushi

(adv) mashilen, mashikoshi (upside down)

\* Tanurtemi ki oset ajak pulapushia ayu.

OLONG PAITEP # 6503

Grid for OLONG PAITEP # 6503 with numbers 1-15 indicating starting points for words.

TIPIEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. \_ \_ \_ \_ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. \_ \_ \_ \_ kibur - (5)
13. Tebur tembar tsüngda jatepba - (4)

OLONG PAITEP # 6502 TELANGZÜBA

TIPIEN :

- 1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.



ALOKBA DANGI AROGO TENZÜKER KA YANGKO SÜNGA ENVELOPE BENER ARUR

Tenzüker : Nür kidangi khen arur ago, jungasa lir südi ?

Alokba : Junga lirako Koda kechi nüngdak.

Tenzüker : Envelope kar bener arur aja....

Alokba : Kechi envelope aka?

Tenzüker : Ya NBCC saru envelope ya ABAM foundation day saru, envelope ya ABAM nung toklang tenzüker medical teyari tenla envelope, ya asen Arogo tamang tenla envelope..... Ano...

Alokba : Akha!! Akha!! Yisua sentsüh baikadi yutsür ao asüno?

Tenzüker : Oh Alokba.

Lilie : T.Ozüküm

Centre-i Meghalaya nung 'scientific mining' asütsü melar

Shillong, May 2, 2023

(Agencies): Centre-i mining leases pezü mulunga agizükogo aser iba ajanga Meghalaya nung 'scientific mining' mesüra 'legal mining' melatsü ta Chief Minister Conrad Sangma-i ashi.

Central Mine Planning & Design Institute Limited (CMPDI) aser Department of Forest and Mining-i Chief Minister Conrad den senden ka

amen. "Minor minerals mesüra major minerals süang mines lapokshitsü atema senotsü lemzüka lir anungji onoki iba mapa tenzüksü. CMPDI aser India sorkar ya ya aika ajangshia aruba agency ka lir anungji onoki parnok den senden menogo aser iba maparen tejakleni aotsü atema jembidar" ta Conrad-i ashi.

"Meghalaya nung scientific mining mesüra mining tenzüksü atema mining lease ya tetsükdaksü liasü. Hopta ka tejakdang India sorkari miners pezü nem mining lease agütsütsü mulunga agizük" ta pai ashi.

"Anungji anogo 30 nungi 45 tsüngda public hearing aser forest clearance aser mining plan mulunga agizüktsü imlar" ta Conrad-isa metetdaksü

Tripura nung industrialists 8-i Rs 312 crore indang mapa inyaksü

Agartala, May 2, 2023

(Agencies): Tripura Chief Minister Prof. Dr Manik Saha lia industrialists 8-i state sorkar den Rs 312.38 crores alang MoU tem nung sign sütepogo.

Investment Round Table (I&C) meeting nung investors 141 shilem agi aser parnok rongnungi investors 8-i Rs 312.38 crores indang MoU nung sign asü.

Dayton Natural Resources Private Limited-i Dhalai district nung medical college ka lapoktsü atema Rs 247 crores enoktsütsü. Iba ya Tripura Tribal Areas Autonomous District Council (TTAADC) kübok lir.

Ano, Northeast Veneers and Plywood-i Operating raw materials bank atema Rs 13.88 crores indang mapa inyaksü.

Galaxy Inn-ia hospitality

maparen atema Rs 4.0 crores indang mapa inyaksü, Chowdhury warehouse-i Rs 30.0 crore (surgical gloves), agro-processing (Rs 4.0 crores) aser Rs 5.50 (Milk processing) indang maparen inyaksü.

"State sorkari investors nem State Capital Investment Subsidy, Industrial Promotion Subsidy, power subsidy, employment cost subsidy, state transport subsidy agütsütsü lemtetogo" ta Chief Minister Prof Dr Manik Saha-i ashi.

"Linük kübok state balala nungi parnok aruogo. Industrialists 8-i Tripura sorkar den MoU sign sütepba atema pelar" ta paisa ashi.

"Prime Minister Narendra Modi-i Tripura renlok daksütsü merangba atema tenüngsang agütsür. Linük mesüra state ka renloktsü atema connectivity

kanga tongtipang aser onok tila asüdang Tripura nung national highways alitsübaji mepungmang saka tangbo national highways 7 lir aser ano aika yangludar. Prime Minister Narendra Modi ajanga asenok nem HIRA Model agütsüogo" ta CM Saha-isa ashi.

"India nung internet facility tsütsü Tripura ya strongest gateway tasembuba lir. Delhi nung nenoki internet connectivity tajung mangutsü saka Tripura nungbo connectivity tajung lir. Agartala mesüra Sabroom nungi state balala dangi express trains 12 senzür. Item ajak ya PM Modi ajanga lir" ta paisa shisem.

Kobi melii Sabroom nung Maitri Setu lapoktsü aser iba ajanga investors ajanzüktsü kechiyong Tripura ya South East Asia atema lenmang asütsü, ta paisa ashi.

Election Commission-i Meghalaya nung VPP agizüker

Shillong, May 2, 2023

(Agencies): Election Commission of India (ECI)-i Voice of the People Party (VPP) ya Meghalaya nung state party ka agizükogo.

Meghalaya legislative assembly nung VPP indang MLA pezü lir.

Tawa Meghalaya assembly elections nung shilem agiba nung ajemdaker ECI-i VPP agizük, ta ECI under-secretary Manish Kumar-i ashi.

VPP-i pür (winner) ka

parnok party symbol amshitsü lemzüksüogo.

Voice of People Party (VPP) ya Meghalaya nung November 2021 nung tenzüka liasü.

2023 Meghalaya legislative assembly election nung VPP-i menden 14 nung toktep aser 4 nung takok angu.

Meghalaya assembly election nung menden 4 nung takok anguba sülen VPP president Ardent Miller Basaiawmoit-i 2028 nung parnoki Meghalaya sorkar akümtsü tebilemba

lemsatepogo.

March 20, 2023 nü Meghalaya governor-i Meghalaya assembly 2023 indang mezüngbuba budget session nung Hindi agi jembiba atema Basaiawmoit aser VPP MLA temi lungkak aita liasü.

Meghalaya ya non-Hindi state ka lir saka Centre-i Meghalaya mezüngmeshia state indang official language mejembiteter Governor ka yokogo ta VPP-i aitsü.

Tatong Tir Jagdeep Dhankhar-i Manipur semdangtsü

Imphal, May 2, 2023

(Agencies): India Tatong Tir Jagdeep Dhankhar-i Bodbarnü Manipur semdangtsü. Pai anogo asemnü atema Manipur semdangi arutsü.

Dhankhar-i Manipur nung amongdang shisaliok reju ana tashi semdanga sentongtem nung adentsü.

Mezüng pai Dhanamanjuri University in Imphal, Manipur nung kaketshirtem aser

tesayurtem den ajurutepa sensaksemsü. Idakji pai campus nung süngdong ka atemtsü.

Iba sülen pai Manipur University semdangtsü aser idakji pai reju balala nungi tesayurtem aser scientists den ajuruteptsü.

Item sentong nung Manipur governor Anusuiya Uikey aser chief minister N Biren Singh naprong adentsü.

Tatong Tir Dhankhar den

sensaksemdang Manipur University, Regional Institute of Medical Sciences, Central Agricultural University, National Institute of Technology, National Sports University, Institute of Bio-Resources & Sustainable Development, Indian Council of Agricultural Research, Council of Scientific & Industrial Research nungi faculties/scientists adentsü.

Assam Police nung yi ajemertem voluntary retirement südaktsür

Guwahati, April 30, 2023

(Agencies): Assam Police nung teti yi ajemer ktdangtsür 300 shi ka nem voluntary retirement agütsütsü ta Chief Minister Himanta Biswa Sarma-i ashi.

Iba maparen tenzüko aser mapa tazüngtem asoshi recruitment tasen shimoktsü, ta pai ashi.

"Assam police nung

ktdangtsür aser jawan 300 shi kati teti yi ajemer aser parnok yi tali ajemba ajanga temang nung timtem adokogo. Parnok asoshi sorkari voluntary retirement scheme (VRS) ka tenzüka lir" ta CM Sarma-i ashi.

"Iba ya inyakyim tejen ka lir saka tesüba mapang mapa küma meinyak" ta paisa shisem.

Assam sorkari decentralization atema mapa

inyaker aser legislative assembly constituency 126 ajak nung deputy commissioner indang office tem lapoktsü atema mapa tenzüko, ta CM Sarma-i metetdaksü.

"Nisungtemi DC indang office nung mapa atema district headquarters bushia maotsü atema onoki meranger. DC indang office ya LAC shia nung alitsüla" ta pai ashi.

*Mulungnen O*



**ASÜR T. MOATEMJEN LONGKUMER**

**ASO: 12TH FEBRUARY, 1963 - ASÜ: 24RD APRIL, 2023**

Onoki teti meima aliba Asür T. Moatemjen Longkumer shiranga alidang aser anojungi asüdang kinunger, kidanger, tembar, CGST & Customs Department, lokti tentet, Arogo, Doctors & Nurses (BLK Delhi aser Eden Hospital Dimapur) aser ana aser talang nungi temolunger temi nübu, shisatsü, ronsen aser tamang sarasadem agi ozü kibong nungita yariba atema pelaba lemsateper. Onoki nenok kija shia dang pelaba meshitetaka asen Tulusang Tsüngremi nenok ajak mulamushia moajang ta sarasademtsür.

~ Temeim Kinungtsü aser kinungertem.

**Office of the Longmisa Senso Mungdang**

P.O.Mokokchung-798601. B.P.O. Longmisa  
Mokokchung : Nagaland.

**TENÜNGSANG AGÜTSÜR**

Dr. Moayangerla. D/o Mr. Imlisama Pongen aser Mrs. Tiapokla Jamir, lai Top 2 jenjang M.B.B.S. Exam February 2023. (NEIGRIHMS) North - Eastern Hill University, Meghalaya. nungi anguba asoshi sensosanger ajaki konang nüngsang aser tetushi agütsür.

Asen teyanglur Tsüngremi tarutsü nunga takok ngudakjang ta sarasademtsür.

**Yashiramok Ao**  
President LSM

**Watitoshi**  
G. Secy. LSM



**OFFICE OF THE CHUMUKEDIMA ONGPANGKONG SENSO TELONGJEM**

Pin. Code: 797103 : Nagaland  
Regd No :- H/RS - 5926

**Raffle Draw Winners**

Date: 01/05/2023

- 1st Prize: 04666**
- 2nd Prize: 02056**
- 3rd Prize: 05257**
- 4th Prize: 01127**
- 5th Prize: 02733**

- |                            |                  |                  |                  |
|----------------------------|------------------|------------------|------------------|
| <b>Consolation Prize :</b> | <b>1. 04549</b>  | <b>2. 02592</b>  | <b>3. 07002</b>  |
|                            | <b>4. 05293</b>  | <b>5. 01213</b>  | <b>6. 00455</b>  |
|                            | <b>7. 02829</b>  | <b>8. 09983</b>  | <b>9. 09802</b>  |
|                            | <b>10. 00613</b> | <b>11. 63241</b> | <b>12. 03678</b> |
|                            | <b>13. 03758</b> | <b>14. 02703</b> | <b>15. 01302</b> |
|                            | <b>16. 03680</b> | <b>17. 05340</b> | <b>18. 03787</b> |
|                            | <b>19. 00966</b> | <b>20. 07096</b> |                  |

Winners may come and collect their prize with the counterpart within 15.05.2023

Sd/-  
President

*Pelaba Lemsateper*

"Kechiaser ibai Tsüngrem teti tatem maka asen Tsüngremji lir; tatem tashi pa asen leniba alitsü."

Tenüngsang Ken 48:14



**P. ALILEMLA LKR**  
ASO: 28/07/1965  
ASÜ: 25/04/2023

Onoki teti meima aliba ojala Asür P. Alemlila Lkr akumli wadang tembanger onok mangyim tejashi nung alidang onok den yariteper ajak dang kanga pelaba lemsateper. Onok asoshi tamajungtiba tensa nunga nenok onok den teti aliba, mera ajak nung onok ajungmesoba ajanga onok temolung anisüngzüker. Nenoki temeim sayuba onok molung nung teti alitsü. Onoki ajak dang tsüngtong arua pelaba meshitetaka asen Tulusang Tsüngremi nenok ajak maneni moatsütsü ta ozü tamang sarasadem.

~ Temeim kinungertem.

**ALL WARD UNION MOKOKCHUNG TOWN (In aid of office building)**

**Raffe Draw Result**

Draw Date: 2/5/2023

- 1st prize: 0113    2nd prize: 1055    3rd prize: 2897  
Consolation Prizes : 1263, 1570, 0552, 3203, 1650, 2005, 1026, 4433, 3643, 3458.

**NB:**

Prize shall be claimed by producing the Original ticket within 10 days after the declaration of result, after which no claims will be entertained.

Sd/-  
Convenor  
9615849847

**Paraguay nung election osang sangdongba sülen longkak ait**

**Asuncion, Monupii/May 02**

(Agencies): Right-wing candidate shiba Paraguay tir election nung tasembuba jenjang nung liasü, pa pusemertem Hombarnü electoral court kima police den mangatettep adoka liasü.

Parnoki election inyakym nung ochi mashi benshiba atema ashishia liasü. Iba election ya tang linük yimsüsüa aliba Colorado Party-i ayong yonga kokogo.

Police-i court headquarters meketa atsü aser longkak aiteritem dak rubber injang khaloktsü, shirnoki meyiper long onlokja liasü. Ktdangsurtemi ashiba agi, Paraguayo Cubas pusemertem meyrejang aika iba tesem nung adenshia liasü.

Ano tanga tesem ka nung i osangbenertem dang ashi.

longkak aiteritemi tire rongga Cubas ya Mongolbarnü lenmang nokdanga ayu aser Brazil den arrtsü nung aliba tawa election nung shimsang Ciudad del Este nungi linük Santiago Pena indang noksa yimtiba Asuncion-i aotsü liasü. keta aliba billboard tem raksaja Election nung tanabuba liasü. Arishi küm 44 tain Pena jenjang nung tembangsang shiba economist ka lir, pai Alegre-ia Twitter ajanga, Deobarnü vote shilem 43 angu electoral court dang vote aser tanabuba jenjang nung züngshitsü aser electronic tembangsang Efrain Alegre-i ballot box tem nung amshiba vote shilem 27 ngua liasü. computer program tem ya international audit ka agitsü shi ngua observer tem asoshi ayongzüka liasü.

Cubas, shibai vote shilme 23 aoksadakja liasü, pai Instagram post ka ajanga vote züngshitsü akhangba den pa pusemertem dang longkak aitsü asoshi ayongzüka liasü.

"Onok temulung msäür. Election ya onok dang nungi rakzükgogo," ta Cubas kinungtsü aser senator Yolanda Paredes-

Electoral court dang vote züngshitsü aser electronic ballot box tem nung amshiba computer program tem ya international audit ka agitsü asoshi ayongzüka liasü. Kasa mapang nung Interior minister Federico Gonzalez-i azüzüktepba inyaksangshitsü ayongzükgogo.

"Inyakym ka sülen inyaksangshidar aser iba ya akümtsübutüsüla," ta pai electoral court inyakym indang ateshia jembi.

**Taliban Foreign Minister-i Islamabad semdangtsü**

**Kabul, Monupii/May 02**

(Agencies): United Nations Security Council committee kati Taliban indang foreign minister Mawlawi Amir Khan Muttaqi iba hopta Pakistan aser China foreign minister tem den ajuruteptsü atema Pakistan-i aotsü asoshi temelaba agütsüogo.

Pakistan indang UN mission-i, May 6 nungi 9 tsüngda Pakistan aser China foreign minister tem den senden ka nung shilem agitsü atema Muttaqi nem temelaba agütsütsü asoshi mepeshiba sülen pai Islamabad semdangtsü.

Afghan foreign minister ya Pakistan indang Foreign Minister Bilawal Bhutto Zardari den ajuruteptsü imlar, ajisüaka tena kechi sensak asemtsü iba indang osang tejangja memetet. Muttaqi-i Pakistan semdangtsü aliba indang Afghanistan foreign ministry-i

tang tashi nung osang kecha agüja mali. Osang ajanga ashiba agi, pa senzügenpongba taa ajak Pakistan-i agütsütsü.

Security Council sanctions kübok Muttaqi ya senzügenpong masütsü asoshi tenokdangba agütsür lir.

Taoba ita UN Security Council committee-i, Afghanistan kidanger linüktem foreign minister tem senden ka nung shilem agitsü atema Uzbekistan-i aotsü asoshi Muttaqi nem temelaba agüja liasü. Iba senden nung security aser tanga onük tongtibangtem sensaksema liasü.

China aser Pakistan nunger ktdangsurtemi taoba mapang parnoki multibillion-dollar China-Pakistan Economic Corridor (CPEC) infrastructure project nung shilem agidaktsütsü atema Afghanistan nung Taliban-i aniba sorkar pelashishia jaoktsü ta shiogo. (Maneni tapak 8 nung...)

## Saina Nehwal Asian Games Trials nung shilem magitetsü



**Monupii/May 2, 2023**

**(Agencies):** Commonwealth Games anaben tashi koker alila Saina Nehwal, temang anema maliba ajanga taruba Asian Games atema national badminton selection trials nung shilem magitetsüsa kumogo.

Hangzhou, China nung September 23 nungi October 8 tashi asayatsü aliba iba asayamung atema team shimsü asoshi Badminton Association of India (BAI)-i ayongzuka May 4 nungi 7 tashi Jwala Gutta Academy of Excellence, Telangana nung trail agitsü.

"Saina Nehwal temang manemba ajanga trails nung shilem magitetsü. Ano tebur tarep asayar Kushal Raj aser Prakash Raj nata trails nung shilem magitetsü," ta BAI secretary Sanjay Mishra-i PTI dang ashi.

"Ajisüaka trails atema jaokba asayatem ajak team nung shilem ka asoshi iba hopta tokteptsü," ta paisa metetdaksü.

Saina tatemsa Orleans Masters nung shilem agiogo. La mapang tatsüka yiruba ajanga junga masayateti arudar, aser taoba world number one asayar ya January Badminton Asia Mixed Team Championships atema trails nung shilem magitet. Maneni

la taoba kum Commonwealth Games atema trails nunga shilem magi.

BAI-i, April 18 nü tashi nung BWF Top 20 ranking list dak ajemdaker Asian Games atema Olympic medallist PV Sindhu (World No. 11), HS Prannoy (world no. 9), tebur tarep asayar Chirag Shetty aser Satwiksairaj Rankireddy (World No. 6) aser tetsür tarep asayar Treesa Jolly aser Gayatri Gopichand (world no. 19) nung trail magi indang indanga shimogo.

National federation-i Asian Games selection trials atema April 22 nü asayatem indang list ka sangdong aser April 28 tashi nung parnok shilem agitsüba indang jangjatsütsü asoshi mapang atakzükja liasü.

World championships silver aser bronze medallists Kidambi Srikanth (World No. 23) aser Commonwealth Games champion Lakshya Sen (World No. 24), Orleans Masters Super 300 winner Priyanshu Rajawat, national champion Mithun Manjunath aser Tokyo Olympian B Sai Praneeth nung tebur kija asaya nung tokteptsü.

Tetsür kija asaya nung Aakarshi Kashyap, Malvika Bansod, Ashmita Chaliha aser Unnati Hooda nung trails nung

shilem agitsü. Trails nung tebur aser tetsür kija asayar asemsem, tarep temeyoktep asayar tarep ana aser tetsür o tebur tarep asayar tarep kaka shimsü.

Asian Games 2023 selection trials atema asayatem:

Tebur kija asaya:

Lakshya Sen, Kidambi Srikanth, Priyanshu Rajawat, Mithun Manjunath, Sai Praneeth, Maisnam Meiraba, Bharat Raghav, Ansal Yadav, Siddhant Gupta

Tetsür kija asaya:

Aakarshi Kashyap, Malvika Bansod, Ashmita Chaliha, Aditi Bhat, Unnati Hooda, Alisha Naik, Shriyanshi Valishetty, Anupama Upadhyay Men's

Tebur tarep asaya:

MR Arjun/Dhruv Kapila, Krishna Prasad/Vishuvaradhan, Suraj Goala/Pruthvi Roy, Nithin HV/Sai Pratheek.

Tetsür tarep asaya:

Ashwini Bhat/Shikha Gautham, Tanisha Crasto/Ashwini Ponnappa, Radhika Sharma/Tanvi Sharma

Tarep temeyoktep asaya:

Rohan Kapoor/Sikki Reddy, Sai Pratheek/Tanisha Crasto, Hariharan/Varshini, Hemagendra Babu/Kanika Kanwal.

## Kohli, Gambhir aser Naveen-ul-Haq dang senchi achi

**Monupii/May 2, 2023**

**(Agencies):** Bharat Ratna Shri Atal Bihari Vajpayee Ekana Cricket Stadium, Lucknow nung Lucknow Super Giants (LSG) aser Royal Challengers Bangalore (RCB) na asaya tembangba sülen LSG team mentor Gautam Gambhir RCB batter Virat Kohli na mangatettep adokba sülen tena dang match fee noklang nung noklang senchi chiogo.

BCCI sangdong ka ajanga ashiba agi, Gambhir aser Kohli napronglai IPL Code of Conduct, Article 2.21 kübok Level 2 nung aibelenba nangzükogo.

Kohli aser Gambhir na taoba mapanga 2013 kum RCB o KKR na asayaba mapang

mangatettep adoka liasü. Iba mapang Gambhir ya KKR captain liasü.

Hombar aonung asaya tembangba sülen salemtpeba mapang LSG bowler Naveen-ul-Haq aser Kohli na o langtepa liasü. Iba sülen LSG opener Kyle Mayers aser Kohli na asatop aser Gambhir teyongtsüi ia Mayers atsünba nguogo.

Ajisüaka meyiper Kohli-i aser Gambhir na o langtep tenzük aser tanga asayatem tena bendangtsütsüsa aküm.

Kasa mapang nung LSG bowler Naveen-ul-Haq danga IPL Code of Conduct nung aibelenba atema pa indang match fees shilem 50 senchi chiogo. Naveen-i Level 1 nung aibelenba nangzükogo.

Hombar aonung asaya nung RCB-i run 126 kanga junga defend süa LSG koka liasü.

Bangalore-i asayar 9 out ser run 126 yangluba ya kanga apara ama bilema liasü, ajisüaka Lucknow puri run memenepi tatembangbuba over nung run 108 dang yanglur aliba mapang parnok asayar ajak out süma.

Maneni captain Lokesh Rahul over tanabuba nung tetsüng nung timtem adoka anir tuguatokba sülen Lucknow atema tebilemstü ka kumogo. Iba sülen Rahul asayai mait aser par team wicket tekububa out asüba sülenang pa aita liasü. Pa ball asem amen ajisüaka run ka danga meyungluteti asaya tembang.

## Asia Cup nung India nung archer temi medal 4 angutsü jangjaogo

**New Delhi, Monupii/May 2**

**(Agencies):** Tashkent nung asaya aliba Asia Cup Stage 2 World Ranking Tournament nung Mongolbarnü recurve aser compound sections nung team events pezüprongla nung India nung archer tem final-i iogo.

Top-seeded India tebur recurve team nung Mrinal Chauhan, Tushar Shelke aser Jayanta Talukdar nung semifinal nung Uzbekistan nung asayar Chen Yao Yuy, Mirjalol Karorov aser Amir Khan Sadikov nung 6-0 (56-54, 57-54, 56-53) agi koka liasü. India tebur recurve team Hokolbarnü final China den asayatsü.

Recurve tetsür team nung Sangeeta, Prachi Singh aser Tanisha Verma nung tiebreaker asayaba sülen 5-4 (53-54, 56-49, 52-50, 52-54, 26\*-26) agi Uzbekistan tetsürteam koka liasü.

## Sharad Pawar-i NCP tir...

Sharad Pawar-i NCP tir mapa toktsütsü atema telemtetba agiba ajanga party lenirtem aika aoksadaktsüogo. Party lenirtem kari, Pawar-i parnok den ken o mashishitepi iba jenjang agiogo ta ashi.

NCP lenir Ajit Pawar-i osangbenertem dang ashiba agi, NCP tekolakba Pawar-i party tir mapa toktsüba tetezü pa yimden yimsüsüba toktsür ta masü. Paisa, NCP tekolakba Pawar-i iba osang ya May 1 nü metetdaksünüa liasü, ajisüaka MVA rally aliba ajanga memetetdaksü, ta ashi. "Iba anogo ya künübo ajurutsü imla liasü," ta Ajit-i ashi.

"Congress party nung Sonia maneni lenir ka lir, saka lai tir mapa bena mali. Asenoki pa tambur akümba ya bilemdangtsüla. Inyakyim ajak pa lenisüba nung dang aotsü," ta Ajit-i ashi.

Shiv Sena lenir Sanjay Raut-i tweet ka ajanga, lokti-i mepeshiba sülen Balasaheb Thackeray ama Pawar-i pa telemtetba meyipa agitsüla, ta ashi.

Maharashtra Congress tir

Quarters nung India tetsür recurve team-i 6-0 (50-40, 54-47, 49-45) agi Saudi Arabia madak takok ngua liasü. Parnok tetsür recurve team final asaya China den asayatsü.

Semi-final atema bye anguba sülen India tebur compound nung Abhishek Verma, Kushal Dalal aser Amit nung Saudi Arabia 236-221 agi koka final-i iogo.

Parnok Hokolbarnü Hong Kong den final asayatsü.

Tetsür compound team nung asayar Parneet Kaur, Pragati aser Raginee Markoo nung qualification round nung temaba jenjang nung tembangba sülen final-i aser parnok gold medal atema Hong Kong den asayatsü.

Asia Cup Stage 2 nung Korea amala team tajungtemi shilem magir aser India-ia iba asayamung atema second-string team tem yokogo.

(Tapak 3 nungi...)

Nana Patole-ia, Sharad Pawar masü tashi lokti tenzükba wadang nung dang alitsü ta bilem, ajisüaka pai kechiba tanü mapa toktsü aji meshitetsü. Iba ajanga Maha Vikas Aghadi (MVA) dak kongshitsü. NCP tir tasenbai MVA metoktsütsü onoki imlar, ta ashi.

Maharashtra chief minister term pezü aser Union Defence aser Agriculture minister mapa abensang Pawar-i, NCP, Congress aser Shiv Sena longjemer 2019 kum Maharashtra Assembly elections nung Maha Vikas Aghadi (MVA) sorkar kümetba nung tongibang shilem agia liasü.

Sharad Pawar-i Congress toktsüba sülen 1999 kum Nationalist Congress Party (NCP) tentet. Congress-i 1999 kum Ato kilonser mapa Sonia Gandhi nem mebendaktsütsü atema anema nokdakba sülen lenir asem mintok aser parnok rongnung Sharad Pawar densema liasü. Sonia ya Italy nung asoba asüba agi parnok anema liasü.

## Taliban Foreign Minister-i Islamabad... (Tapak 7 nungi...)

Kasa mapang nung United States, Russia, China aser tanga linük 20 nungi envoy tem aser lokti tentet balala nungi lenirtem Hombar nung Qatar nung ajurutepa Afghanistan nung Taliban yimsüsüba kübok tetsürtem temeden dak sendakba nung sensaksemogo.

Iba senden nung shilem agiba linüktem rongnung China, France, Germany, India, Indonesia, Iran, Japan, Kazakhstan, Kyrgyzstan, Norway, Pakistan, Qatar, Russia, Saudi Arabia, Tajikistan, Turkey,

Turkmenistan, United Arab Emirates, Britain, United States, Uzbekistan, European Union aser Organisation of Islamic Cooperation densema liasü.

Ajisüaka iba senden nung shilem agitsü atema Taliban nung ketdangsurtem mejaok, ta UN otongdar Stephane Dujarric-i ashi.

Afghanistan ya South aser Central Asia sendaktepba lenmang tongtibang ka nung amenoka lir aser iba linük nung dollar billion aika alang alirongsentem mamshi lir.

**BILEMDANGANG**

"Tangari züngshitsüsa mapatem inyangang."